

Кондак 1

Избранныи проповедницы Агнца Непорочнаго, за ны закланнаго, Христа Бога, преславнии Апостоли Петре и Павле! Яко Богочеловечеством концы мира озарившии и обильне струями благодати напоившии, и ныне с любовию призрите на чтущия усердно память вашу. Исполните нас духа премудрости, сердца наша верою утвердите, да непрестанно благодарственная вам поем, со умилением зовуще:

Радуйтесь, святыи первоверховнии Апостоли Петре и Павле.

Икос 1

Ангели благовестницы явистеся на земли, Апостоли Петре и Павле блаженнии, зане от Самаго Виновника спасения нашего на делание ваше призвании бывше, широту всея земли обтекосте, иудеом и еллином Христа распятаго, Божию Силу и Божию Премудрость, проповедающе. Темже и мы, светом учений ваших озаряеми, сердцем и усты взываем к вам сицевая:

Радуйтесь, звезды светозарныя, от востока возсиявшия и всем людем путь ко Христу показавшия; радуйтесь, Церкве Христовы утверждение и столпи непоколебимии.

Радуйтесь, власть вязати и решити грехи наша от Христа приемшии; радуйтесь, во святых писаниих ваших к вере и упованию на Бога вся ны призывающии.

Радуйтесь, в житии вашем образы обращения согрешающим явившии; радуйтесь, высоту любве истинныя словом и делом нам показавшии.

Радуйтесь, святыи первоверховнии Апостоли Петре и Павле.

Кондак 2

Видя тя, апостоле Петре, на море Галилейском вкупе со Андреом, братом твоим, вметающа мрежи, Господь рече вам: «Гряддита по Мне, и сотворю вы ловца человеком». И абие, оставльше мрежи, по Нем идосте. Темже, красото Церкви вселенских, сотво-

ри и нас предстательством твоим скоры быти на делание заповедей Божиих, косны же ко греху, да, злобою младенствующе, достигнем вси в меру возраста мужа совершенна, поюще Богови: Аллилуя.

Икос 2

Разум Божественный освети тя, Павле, избранный сосуде Божий, егда, ревнуя о отеческих преданиях, шествовал еси в Дамаск гонити Церковь Христову. Тогда бо внезапу сияние Славы Господни облиста тебе и глас бысть с Небесе: «Савле, Савле, что Мя гониши?» Ты же, аще зрением плотским омрачился еси, но духом узрел еси Силу и Славу Христа распята, тьму просвещающа и любовию Церковь Свою созидающа, и того ради пленился еси духом, покаяние и послушание нося и глаголя: «Господи, что сотворю?» Посем, восприим жребий апостольства от руки Господни и крещение водою и Духом от Анании блаженнейшаго, явился еси предивно сосуд избранный благодати и свидетель немолчный Спасителя нашего, от Негоже и мы, просвещаемии, пети тебе навыкохом сицевая:

Радуйся, светлосте церковная, от Света Неизреченного на пути пречудно во откровение языков возжженная; радуйся, знамения Силы Божия в житии твоем чудно явивый и тем уста непокоривым навеки заградивый.

Радуйся, сосуде избранный, меньша от Апостол и первого от грешник себе сокрушенно нарекий; радуйся, якоже Херувим тайнозритель, даже до третияго Небесе верою и любовию вознесенный.

Радуйся, якоже Серафим пламенный, ревностию по Бозе непрестанно снедаемый и истаеваемый; радуйтесь, Павле и Петре, благовестия трубы громогласныя, основания ветхаго мира, якоже Иерихон второй сокрушившия.

Радуйтесь, святии первоверховни Апостоли Петре и Павле.

Кондак 3

Сила Вышняго, в немощех познаваемая, излия на тя, Павле, адаманте веры, благодать на благодать, зане неложно исповедовал еси: «Вся могу о укрепляющем мя Иисусе». И воистину проповедал еси Евангелие во явлении Духа и силы, творя великая и неизреченная, славная же и ужасная, яко не ведущии Бога Боговещению научахуся, сердца ожесточенная елеом милосердия напаяхуся и вся овцы расточенные во ограду Пастыря Единаго отвсюду стекахуся, Ему же и пети согласно научишася: Аллилуиа.

Икос 3

Имея дерзновенную любовь ко Господу, шествовал еси, Петре, по водам воздвизаемым, яко по суху. Но аще и потоплением был еси устрашаем и сомнением обуреваем, не потопился еси в пучине, понеже простерл еси руце и очи ко Спасу, вопия Ему из глубины сердечныя: «Господи, спаси мя». И в той час руку помощи восприял еси от Христа, Избавителя нашего. Тако и мы в сей юдоли земней, бедами устрашаеми и волнами страстей потопляеми, взирающе на течение твое, к тихому пристанищу добре нас наставляющее, благодарственно воспеваем ти сице:

Радуйся, каменю веры многоценный, от Камене Краеугольна избранный и утвержденный; радуйся, храме Духа Святаго, многоразличными дарованьми от Того преизрядно украшенный.

Радуйся, рыбарю препростый, премудрости Божия исполненный, ейже от человек никтоже противитися может; радуйся, самовидче величия Божия, паче царей и славных земли от Господа на вся веки прославленный.

Радуйся, хартие одухотворенная, в нюже огненными письмены слово Божие вписася; радуйся, с Павлом апостолом светило равночестное и незаходимое.

Радуйтесь, святии первоверховнии Апостоли Петре и Павле.

Кондак 4

Бурю лютых искушений воздвиже древле человекоубийца, исконы иский Церковь Божию потребити и ученики Спасовы, якоже пшеницу, разсеяти: но Господь молися о тебе, Петре, да не оскудеть вера твоя. И тако, от Спаса просвещаемъ и от Него в немоющи укрепляемъ, воистину сокрушил еси челюсти вражия и обращся утвердил еси братию твою, пая Богу: Аллилуиа.

Икос 4

Слышаще, Павле премудре, о дивнем избрании твоем, во еже возвестити имя Господа Иисуса народом и царем и сыном Израилем, и видяще тя в слове, в житии, в любви, в дусе, в вере, в чистоте, якоже света языком во спасение их поставлена, неверний верою просвещахуся, верний же, ликовствующе, Господа прославляху. Темже и мы, сорадоватися заповедь приемше, приносим ти гласом радования таковая:

Радуйся, верный служителю Христов, вся славная мира якоже сор и прах вменивый и всем себе поработивый Христа ради и Евангелия; радуйся, добрый воине Христов, во вся оружия Божия облеченный и вся языки в послушание Христово покоривый.

Радуйся, жертво приятнейшая, Христу сораспеншаяся, Христа ради по вся дни умирati приобыкшая; радуйся, сеятелю слезами многими, узниче и исповедниче преславный, язвы Господа Иисуса Христа на теле твоем радостно носивый.

Радуйся, славо и похвало Церкве Вселенския, позорище мирови бывый, глад, жажду, наготу, биение и поругание за Христа многочастне претерпевый; радуйтесь, Павле и Петре, Апостолов укращение, миру благовестницы, Церкве утверждение.

Радуйтесь, святии первоверховнии Апостоли Петре и Павле.

Кондак 5

Боготечная звезда явился еси, Павле, егда течение твое, пресветло начен от Дамаска, даже до Рима простерл еси и, якоже прежде звезда от восток научи волхвы кланятися Солнцу Правды, си-

це и ты, Богомудре, путь ко Христу показал еси всем, хотящим достигнути спасения, взывая со дерзновением многим: «Подражатели мне бывайте, якоже и аз Христу». Ему же и пети научил еси нас единеми усты: Аллилуиа.

Икос 5

Видев на горе Фаворстей Славу Единородного от Отца, одеяна Светом, яко ризою, хотяща же за ны облещися в ризу поругания, глаголал еси, Петре, Иисусови, провидя славу несказанную искупленных Кровию Агнца Непорочна Христа: «Господи, добро есть нам зде быти». Сего ради и мы, роди дальний, лишени чистоты светозарныя, аще и недостойни суще, обаче твоим ангельским гласом призваннии к наследию нетленну, чисту, неувядаему, соблюдаему на Небесех, якоже общницы хотящей открытия Славе, воспеваем ти сице:

Радуйся, блаженне, от Присносущныя Истины достойно «блажен» нареченный; радуйся, бисере предобный, от Господа приезере обретенный и светом от Света осиянный.

Радуйся, от Самаго Искупителя рода человеча на проповедь Евангелия посланный; радуйся, воистину ловец человеков явившийся, ты бо, якоже и прежде, благодатию влечеши души омраченныя в чудный Свет Христа Бога.

Радуйся, источниче животворный, от Источника жизни вечныя истекий и от богатства даров Духа Святаго жаждущия души напояй; радуйтесь, Петре и Павле, якоже Серафими шестокрилатии, у Престола Царя Славы парящии и ко свету Тайн Божиих примиращии.

Радуйтесь, святии первоверховнии Апостоли Петре и Павле.

Кондак 6

Проповедник немолчен и по смерти твоей, Петре Богоносне, явился еси, зане с неба мысленнаго, якоже гром таинственный, озвании христианством многоразличне напоминаеши. Мы же, ведя-

ще любовь твою николиже отпадающу и молитву о нас непрестанно у Престола Божия деему, поем сердцем умиленным: Аллилуиа.

Икос 6

Возсиял еси, Павле великоимените, знаменьми и чудесы вскоре, отнележе Дух Святый во Антиохии повеле ти начати превеликое служение Апостола языков: также, достиг Кипра, Елимы волхва зре́ние омрачил еси и Сергия проконсула светом истины озарил еси. Сподоби и нас, света сего причащихся, прославити дивная дела твоя в песнях и пениях духовных и воспевати тебе таковая:

Радуйся, свете сердец кротких и разумных, яже, яко доилица, грееша и пестунствуеши писаньми твоими Богодухновенными; радуйся, жезле наказания, сосуды лжи и льсти до конца сокруша́й, сердца же сокрушенная на недвижимый камень веры воздви-заяй.

Радуйся, Христово Евангелие в себе воплотивый и сего ради превыше видимых вознесенный и прославленный; радуйся, уста медоточная, радость многую Апостолом и верным возвестившая, яко отверзе тобою Господь дверь спасения всем языком.

Радуйся, ревнителю по Бозе, новый Илие, не на чуждем основании созида́й и ревностию твою страны дальния обтека́й; радуйтесь, Павле и Петре, весь мир между вами разделивши, во еже овому убо быти Апостолу языков, другому же проповедати на-роду избранному.

Радуйтесь, святыи первоверховнии Апостоли Петре и Павле.

Кондак 7

Хотя истину утвердити и мир Церкви оградити, пришел еси, Павле, поборниче правды, во святый град, в немже на собрании святых Апостол и верных свидетельствовал еси вкупе с Петром и Варнавою, яко Дух Святый дышит, идеже хощет, даруя благодать Свою независтно иудеом и еллином и верою вся спасая, а не мертвенно́ми делы ветхаго закона. И тако воистину вси вернии, сво-

боду и мир получивше, союзом любве связуеми, благодарственno воспевают Богови: Аллилуиа.

Икос 7

Новаго архангела, провозвестника тайны, от века сокровенныя, избра тя, Апостоле Петре, Господь, егда вопросы ученики Своя: «Вы же кого Мя глаголете быти?» Ты же, от Отца Небеснаго просвещаем, возвестил еси несомненное основание нашей веры, глаголя ко Спасу: «Ты еси Христос, Сын Бога Живаго». Того ради и мы, чтуще тя, яко надежду нашего спасения неприкровенно исповедавша, взыываем ти таковая:

Радуйся, Синаю новый, скрижаль спасения людем ясно показавый и свободу во Христе возвестивый; радуйся, первоположенный от Архитектона Небеснаго каменю веры и исповедания, на немже Церковь Христова необоримо основася.

Радуйся, первопоставленный вратарю входа райского, ему же первое обещася Господь дати ключи Царствия Небеснаго; радуйся, судие праведный, имый судити с прочими Апостолы обеманадесьте коленома Израилевома.

Радуйся, яко очеса и ушеса твоя блаженная Христа Спаса нашего, Егоже лицезрети пророцы пламенне желаху, во плоти суща на земли видеша и слышаша; радуйтесь, Петре и Павле, имущии ноги благовествования краснейшия и сердца освященная, вы бо Евангелию послужисте и евангельски пожисте.

Радуйтесь, святии первоверховнии Апостоли Петре и Павле.

Кондак 8

Странное чудо и неудобь разумеваемое явился еси, Петре, мудрствующим земная, яко незната мира и уничижена избра тя Господь, и посрамил еси мудрыя, одолел еси царства, привел еси сонмы омраченных ко Свету Истины, и доныне, якоже столп огненный, озаряеши вся земнородныя, указуя несомненный путь во блаженное Отечество. Сего ради, богатству благодати в тебе дивя-

щеся, поем Богу: Аллилуиа.

Икос 8

Всем был еси вся, Павле, любовию всех объемля, словом спасения дальних и ближних достизая, верою вся превозмогая: зане и в Филиппех, мир благовествуя, аще и палицами биен был еси люте и в темницу во оковах ввержен, но воспел еси тамо вкупе с Силою песнь чудную хвалы и благодарения Богу, Иже и возгрeme рабом Своим трусом велиим, яко и основания темничная поколебашася и двери отверзоша. Мы же, видяще тя, премудре, тьму узилища светом Боговедения озаряюща и свободу о Христе узником подающа, воспеваем ти сицевая:

Радуйся, узниче Христов, темницу во храм претворивый и узами твоими демонов цепи людем разрешивый; радуйся, сильне, немощи немощных понесый, не себе, но ближним угоджати иский.

Радуйся, пречудне, узами и скорбьми хваливыйся, радоватися с радующимися и плакати с плачущими научивый; радуйся, умерый греху, но присно живый Богови, тебе бо жизнь Христос и смерть приобретение.

Радуйся, образе неусыпнаго делания, задняя забываяй, в предняя простираяйся и всем помышлением к почести вышняго звания текий; радуйтесь, Павле и Петре, даже до смерти мученически Господу послуживши и сею, яко венцем, подвиг ваш венчавши.

Радуйтесь, святии первоверховни Апостоли Петре и Павле.

Кондак 9

Вся ко Христу приводя, возвестил еси, Павле, во Афинех мнящимся мудрым быти Премудрость, свыше сходящую, да, ведяще суетная, отселе уведят Бога, невидимаго им, и осяжут Его, о Нем бо живем и движемся и есмы. Темже и мы, благодатию неизреченною разум истины восприемше и сердцем неложно, яко благ

Господь, постигше, поем Ему верою твердою, якоже перстом от Фомы, осязуему: Аллилуиа.

Икос 9

Витийствовати не можаше язык человечъ, егда Господь Сил нозе рабом Своим умываше и лентием отираше. Ты же, Петре, страхом побеждаемъ, аще возгласил еси: «Не умыеши ногу мою вовеки», но абие весь в послушание преложился еси, егда услышал еси глагол, реченный от Господа: «Аще не умыю тебе, не имаши части со Мною». И тако всем сердцем возопил еси: «Господи, не нозе мои токмо, но и руце, и главу». Мы же, ведяще тя в сих, якоже злато во огни искушения, очищаема и познавающе от смирения к послушанию восхождение твое, таинству Божия промышления покланяющеся, воспеваем ти сердцем смиренным таковая:

Радуйся, Петре, очеса орля, имиже зрел еси Солнце Правды — Христа Бога, Иуде нозе умывшаго и от него лобзанием лукавым преданнаго; радуйся, навеки невестивыйся Христу, ты бо, Агнцу Непорочну, якоже агнец, последуя, до заклания твоего верность сблюл еси.

Радуйся, углю неугасимый, от жертвенника Небеснаго огнем любве Божественныя непрестанно объятый; радуйся, светильниче горяй и светяй, роды родов светом правды озаряй.

Радуйся, грозде многообильный винограда Христова, на радость мира многопечального возращенный; радуйтесь, Петре и Павле, Христа Бога в себе верно вообразивши.

Радуйтесь, святии первоверховнии Апостоли Петре и Павле.

Кондак 10

Спасения во Христе неизследимую пучину и покаяния многую силу явил еси в себе, Петре, егда трикраты по предреченному отверглся еси Господа: «Не вем Человека Сего!» Егда клялся и ротился еси во дворе архиерея, но абие, воспомянув глагол Иисусов, вне

текл еси, плакася горько. Мы же, умильне взирающе на пресветлый сей образ сокрушения, в научение и обличение жестоковийных сердец наших дарованный, поем Господу, паки дивно возвеличившему тя: Аллилуиа.

Икос 10

Стена и оружие непобедимое был еси, Павле, противу ми-родержителей тьмы века сего, яко и царство их в Коринфе, Ефесе и иных градех вселенныя сокрушил еси, тьму многобожия разгоняя и разум истины утверждая. Ты бо неложно показался еси Божий слуга в терпении мнозе, в скорбех, бедах, в теснотах, в ранах, темницах, в нестроениих, трудех, во бдениих, в пощениих, яко и ум наш недоумеет изреци богатство доброты твоей, деннонощныя подвиги со слезами многими. Того ради, зряще море любве твоей, дерзающе молим: услыши нас, убогих, грешными усты глаголющих сицевая:

Радуйся, умерый греху благовестниче непобедимый, яко в себе первое ветхаго человека победив, Христу сораспялся еси; радуйся, учителю многоплодный и волков хищных обличителю, яко тобою образ верным показал еси, присно бодрствуя и научая вся сугубо: словом и житием по слову.

Радуйся, всех обогатителю, яко, прежде сам обнищав и ничтоже имый, вся содержал еси; радуйся, о христианех пламенный ревнителю, обручивый я Христу, яко деву чисту, непорочную невесту.

Радуйся, утробо многоболезненная бывый о чадех твоих в муках рождения, дондеже вообразится в них Христос; радуйтесь, Павле и Петре, в Дусе единице согласная во едином граде верность Христу кровию запечатлевший.

Радуйтесь, святии первоверховни Апостоли Петре и Павле.

Кондак 11

Пети и ублажати узы и страдания твоя, Павле многострав-

дальне, достойно есть, яко не токмо в терпении мнозе, но и с радостию предреченные ти от Агава пророка узы восприял еси, и Церкви Кесарийстей свидетельствовал еси сице: «Не точию связан быти готов есмь за имя Господа Иисуса». Ему же и мы, дивному во святых Своих, поем песнь: Аллилуиа.

Икос 11

Светом радости неизреченные и Божественные любве осиян был еси, Петре, егда Господь по воскресении первое прочих апостол явися тебе, скорбевшему. По сих же паки явлься, Владыка жизни вопроси тя трикраты: «Симоне Ионин, любиши ли Мя?» Ты же, огнем Божественные любве опаляем, отвещал еси тепле: «Господи, Ты веси, яко люблю Тя». Того ради и мы, обнищавшии духом, помянувше преизобильные токи слез и любве твоей, ихже ради воззва тя Господь на прежний степень апостольства, благоговейне взыываем ти сицевая:

Радуйся, учителю покаяния, слезами горькими высоту смиренния стяжавый и Воскресшим от гроба к радости неизглаголанней на веки приобщенный; радуйся, премудрости глубино, смиренномудрия высото, пламеню любве, образ жития всем верным себе явивый.

Радуйся, друже Господа Иисуса, иго благовестия ревностно понесый, над наследием Божиим господствовать не восхотевый, но послушанию властем научивый; радуйся, Апостоле Христов, мудрость змиину и чистоту голубину в себе сочетавый и образом смерти твоей на кресте крайнее смиренномудрие показавый.

Радуйся, рабе Господа верный, умноживый данный тебе талант и в радость Господа вшедый; радуйтесь, Петре и Павле, сердца не тесная, весь мир любовию вместившая и концы вселенныя просветившая.

Радуйтесь, святии первоверховнии Апостоли Петре и Павле.

Кондак 12

Благодать Духа Утешителя, излиявшаяся на главы верных во образе языков огненных, скоро излияся из уст твоих, Петре, глаголом огненным, во еже благовестити с силою многою Христа распята не точию погибшим овцам дому Израилева, но и язычестей не-плодящей церкви, да плодоносит и сия Богови нетленный крин чистоты и покаяния. Испроси и нам, Апостоле достоблаженне, милость Господа, творящаго тобою великая и чудная, рукою твою мертвяя воскрешающа и смертию твою на кресте мертвеннюю любовь нашу воспламеняюща, да непрестанно поем Ему: Аллилу-иа.

Икос 12

Поюще пресветлую память твою, Павле, достойно ублажаем неизреченные подвиги, болезни и труды, яже во бдениях, во алчбе и жажде, в пощениих, в зиме и наготе понесл еси. Кто бо изочтет раны, скорби и беды твоя во градех, в пустыни, в мори, беды от разбойник, беды от сродник, беды от язык и лжебратии? Кто подобен тебе? Паче всех Апостол потрудился еси. Темже молим: не возгнушайся нас, грешных, молящихся тебе, но якоже всем был еси вся, и ныне услыши немощным гласом приносимая ти сицевая:

Радуйся, узнине Христов, из темницы свет распространивый, словом и посланием во узах много потрудивыйся, зане воистину слово Божие не вяжется; радуйся, неизследимая пучино любве, по братии твоей отлучен быти от Христа преискренне восхотевый.

Радуйся, подвижниче предивный, подвигом добрым подвизавшийся, течение совершивый и кровию твою Церковь украсивый; радуйся, источай море чудес, яко главотяжи и убрусцы твои недуги исцеляху и демоны прогоняху.

Радуйся, любве Божия неразлучный причастниче, горняя мудрствуяй, а не земная, зане и от плоти разрешитися и со Христом быти возжелал еси; радуйтесь, Павле и Петре, веры христианския насадителе, благочестия водами напоителе и ко пристанищу

вечному верии водителие.

Радуйтесь, святии первоверховнии Апостоли Петре и Павле.

Кондак 13

О всехвальнии благовестницы Петре и Павле! Внемлите воздыханием сердец наших, молящиеся за ны, много бо может молитва праведных пред Богом: потщитеся и ныне воспоминати нам о небесном звании и христианстей кончине жизни нашей, привлеките нас ко сладости евангельская истины, свяжите узами любви Христовы, да мы вси, отвергшеся нечестия и мирских похотей, внидем в радость Господа нашего, поюще Ему со Ангелы и с лики святых: Аллилуиа.

(Кондак 13 читается трижды...)

Кондак 1

Избрании проповедницы Агнца Непорочнаго, за ны закланнаго, Христа Бога, преславнии Апостоли Петре и Павле! Яко Боговедением концы мира озарившии и обильне струями благодати напоившии, и ныне с любовию призрите на чтущия усердно память вашу. Исполните нас духа премудрости, сердца наша верою утвердите, да непрестанно благодарственная вам поем, со умилением зовуще:

Радуйтесь, святии первоверховнии Апостоли Петре и Павле.

Икос 1

Ангели благовестницы явистесь на земли, Апостоли Петре и Павле блаженнии, зане от Самаго Виновника спасения нашего на делание ваше призвани бывше, широту всея земли обтекосте, иудеом и еллином Христа распятаго, Божию Силу и Божию Премудрость, проповедающе. Темже и мы, светом учений ваших озаряеми, сердцем и усты взываем к вам сицевая:

Радуйтесь, звезды светозарныя, от востока возсиявшия и всем людем путь ко Христу показавшия; радуйтесь, Церкве Христовы утверждение и столпи непоколебимии.

Радуйтесь, власть вязати и решити грехи наша от Христа при-

имшии; радуйтесь, во святых писаниих ваших к вере и упованию на Бога вся ны призывающии.

Радуйтесь, в житии вашем образы обращения согрешающим явившии; радуйтесь, высоту любве истинныя словом и делом нам показавшии.

Радуйтесь, святии первоверховнии Апостоли Петре и Павле.

Молитва

О преславнии апостоли Петре и Павле, души за Христа предавшии и кровию вашею пажить Его удобрившии! Услышите чад ваших молитвы и вздохания, сердцем сокрушенным ныне приносимыя. Се бо беззаконьми омрачихомся и того ради бедами, якоже тучами, обложихомся, елея же доброго жития обнищаом зело. О сильнии! Понесите немощи наша, не отлучайтесь духом от нас, да не разлучимся вконец от любве Божия, но крепким заступлением вашим нас защитите, да помилует Господь всех нас молитв ваших ради, да истребит же рукописание безмерных грехов наших и да сподобит со всеми святыми блаженного Царствия и брака Агнца Своего, Ему же честь, и слава, и благодарение, и поклонение во веки веков. Аминь.

ТРОПАРЬ, ГЛАС 4

Апостолов первопрестольницы и вселенныя учителие, Владыку всех молите мир вселенней даровати и душам нашим велию милость.

КОНДАК, ГЛАС 2

Твердыя и Боговещанныя проповедатели, верх апостолов Твоих, Господи, приял еси в наслаждение благих Твоих и покой: болезни бо онех и смерть приял еси паче всякаго всеплодия, Едино, сведый сердечная.

ВЕЛИЧАНИЕ

Величáем вас,/ апóстоли Христóвы Пéтре и Пáвле,/ весь мир учéньми свойми просветíвшия// и вся концы ко Христу привéдшия.